

**UCAPAN PERDANA MENTERI DI MAJLIS PERJUMPAAN
DENGAN PENDUDUK-PENDUDUK DI LADANG NENAS
SIMPANG RENGAM, KLUANG, JOHOR, PADA
13 JANUARI, 1979.**

Assalamualaikum Warahmatullahi Wabarakatuh.

Y.B. Dato Syed Zain Al-Sahab, Y.B. Ahli-ahli Exco Negeri Johor, Yang Berusaha Pegawai Daerah Kluang, tuan-tuan dan puan-puan sekalian.

Bismilla-hirrahma-nirrahim.

Saya amat sukacita kerana dapat melawat ke Ladang Nenas Simpang Renggam pada hari ini dan seterusnya menghadiri Majlis Perjumpaan dengan penduduk-penduduk di sini. Inilah kali pertama perjumpaan seperti ini dianjurkan bagi kawasan ini selepas pilihanraya umum. Dengan adanya majlis seperti ini maka dapatlah saya memahami hasrat rakyat serta mengetahui dengan lebih mendalam lagi masalah-masalah tempatan. Apa jua yang akan dikemukakan akan saya ambil ingatan dan mana-mana yang menasabah tindakan akan diambil, samada oleh Kerajaan Negeri atau Kerajaan Persekutuan melalui Jabatan-jabatan yang berkenaan.

Perjumpaan seperti ini amatlah sesuai bagi kita memberi erti yang sepenuhnya kepada keputusan pilihanraya umum di mana seluruh rakyat telah memberikan mandat baru yang menyeluruh kepada Barisan Nasional untuk mentadbirkan negara. Dalam hal ini kita mestilah ingat bahawa kedua-dua belah pihak iaitu Kerajaan dan rakyat, mempunyai peranan dan tugas masing-masing bagi menjamin masa depan negara. Semua pihak hendaklah menunaikan kewajipan dan tanggungjawab mereka supaya hasrat kita untuk membina sebuah negara Malaysia yang aman, adil, makmur dan bersatupadu, dapat dicapai dengan jayanya.

Dalam usaha mewujudkan sebuah negara Malaysia yang sebegini rupa, Kerajaan adalah 'committed' kepada Dasar Ekonomi Baru. Bahkan ianya merupakan dasar Kerajaan yang terpenting sekali. Satu-satunya matlamat dasar ini ialah hendak mengurang dan seterusnya membasmi kemiskinan di kalangan rakyat, tanpa mengira kaum dan keturunan. Dengan jalan ini, maka hasrat kita untuk mendirikan sebuah masyarakat adil serta mewujudkan perpaduan di kalangan rakyat berbilang kaum,

akan dapat diperolehi. Tanpa masyarakat adil dan perpaduan, kekayaan dan kemakmuran, tidak akan memberi apa-apa erti kepada negara.

Jika kita gagal mencapai matlamat Dasar Ekonomi Baru, maka jurang perbezaan ekonomi di antara golongan yang berada dengan rakyat yang miskin yang masih lagi terdapat sekarang ini, akan menjadi semakin luas. Ini adalah satu bahaya besar kepada kita kerana ia boleh membawa akibat yang buruk kepada ketenteraman dan keselamatan negara. Gejala-gejala seperti anasir-anasir subversif dan anti-nasional serta agen-agen pengganas komunis akan menggunakan rasa tidak puas hati rakyat untuk menimbulkan kekacauan dan huru-hara. Kita memang tidak mahukan perkara seperti ini berlaku. Itulah sebabnya, Kerajaan sentiasa menjalankan berbagai usaha serta melaksanakan projek dan rancangan yang boleh membawa kepada perpaduan kaum yang berkekalan.

Tuan-tuan dan puan-puan sekalian,

Malaysia mempunyai kekayaan yang boleh dikecapi dan dinikmati oleh semua rakyat. Hasrat Kerajaan ialah hendak menggembelingkan segala punca kekayaan ini bagi membangunkan negara serta menggerakkan kegiatan ekonominya supaya setiap rakyat terutama mereka yang miskin dan yang tidak berupaya, bersama-sama dapat menikmati kekayaan dan kemakmuran negara. Oleh kerana sebahagian besar daripada rakyat yang terdiri dari golongan tidak berada itu tinggal di luar bandar, maka Kerajaan memberi perhatian yang berat terhadap ekonomi mereka.

Bagi mencapai hasrat ini, penduduk-penduduk kawasan luar bandar hendaklah menunaikan tugas positif mereka. Mereka sendiri hendaklah rajin berusaha untuk memajukan diri mereka sendiri. Hasrat kita tidak akan tercapai sekiranya rakyat mengharapkan kepada Kerajaan semata-mata. Segala kemudahan yang disediakan oleh Kerajaan akan menjadi sia-sia jika rakyat sendiri tidak bersungguh-sungguh berusaha. Rakyat berkewajipan menunaikan peranan masing-masing bagi menolong Kerajaan memajukan rakyat jelata.

Dalam konteks ini, tuan-tuan dan puan-puan sekalian mestilah melengkapi diri dengan ilmu pengetahuan supaya dapat menjadikan diri sendiri sebagai pekebun-pekebun kecil yang cekap dan maju. Gunakanlah sepenuhnya kemudahan-kemudahan yang disediakan oleh Kerajaan. Umpamanya, pekebun-pekebun kecil seharusnya bergiat aktif dengan menggunakan sepenuhnya peluang yang sedia ada bagi melengkapi diri sebagai pekebun-pekebun kecil yang berpengetahuan. Dalam

kerja-kerja seharian, mereka hendaklah mengamalkan teknik-teknik penanaman moden dan saintifik. Ini akan menambahkan lagi pengeluaran dan pendapatan yang boleh memberi makna kepada usaha-usaha Kerajaan hendak meninggikan taraf ekonomi serta memperbaiki keadaan hidup pekebun-pekebun kecil. Pengeluaran dari kebun-kebun kecil yang meningkat naik itu akan menambahkan lagi hasil pengeluaran negara. Dengan jalan ini pekebun-pekebun kecil juga dapat menolong mengukuhkan lagi kedudukan ekonomi negara. Ini adalah satu sumbangan besar yang boleh dilakukan oleh pekebun-pekebun kecil.

Tuan-tuan dan puan-puan sekalian,

Apabila saya menggesa pekebun-pekebun kecil supaya menambahkan lagi pengetahuan mereka, seharusnya implikasi ini dapat diperluaskan sehingga meliputi lain-lain ahli dalam keluarga, terutama kepada anak-anak. Ini amatlah penting kerana dengan tercapainya kemajuan yang tinggi di dalam bidang pendidikan dan pelajaran di kalangan anak-anak kita, nescaya akan wujudlah pula satu golongan generasi muda yang mempunyai pencapaian pelajaran yang tinggi mutunya. Pelajaran adalah asas utama bagi mencapai kemajuan hidup. Dalam zaman sains dan teknologi ini, pelajaran amatlah penting.

Golongan muda yang terpelajar mempunyai peranannya yang tersendiri. Ia akan menjadi teras kepada pembentukan satu kelas menengah yang kukuh dan sihat satu kelas yang dianggotai oleh para elit dan cerdik pandai. Golongan ini sangat-sangat diperlukan di dalam sesebuah negara kerana ianya merupakan sebuah takungan (reservoir) di mana kita dapat meminta idea-idea dalam usaha kita membentuk sebuah negara. Sesungguhnya kita memerlukan anak-anak muda dari semua golongan dan lapisan masyarakat, terutama dari kawasan-kawasan luar bandar, bagi menganggotai golongan ini dan seterusnya menjadi asas dalam usaha kita mewujudkan sebuah negara Malaysia yang adil, yang kaya dan yang makmur, lagi bersatupadu.

Saya menyeru setiap rakyat, samada penduduk-penduduk kampung, petani atau peladang, nelayan dan golongan pekerja serta usahawan-usahawan dan lain-lain anggota sektor swasta, berusaha dengan lebih aktif serta bergiat secara jujur dan ikhlas, membantu Kerajaan melaksanakan setiap usaha dan rancangannya. Kerjasama dan penyertaan rakyat adalah penting bagi menjayakan segala hasrat dan cita-cita rakyat.

Akhirnya, saya mengucapkan terimakasih serta setinggi-tinggi penghargaan kepada penduduk-penduduk Simpang Renggam, pekerja dan

pihak berkuasa Ladang Nenas, kerana menjayakan lawatan saya ini. Demikianlah juga dengan penghormatan yang telah diberikan kepada saya dalam lawatan ini. Saya berharap dapat melakukan lawatan seperti ini ke kawasan dan kampung yang lain dari masa ke semasa.

Sekianlah sahaja dan terimakasih.